

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

- 1- चुनावs आयोग नै चुनाव बांड सरबंधी आंकड़ें वेबसाइट पर जारी कीते।
- 2- उपराज्यपाल मनोज सिन्हा हुंदी अगुवाई च प्रशासनिक कौंसल नै जम्मू-कश्मीर फिल्म नीति 2024 गी मंजूरी दिती। कौंसल नै घरेलू उपभोक्ताएं लेई बिजली सरबंधी एमनेस्टी स्कीम गी बी अगगे बधाया।
- 3- सरकार नै पेट्रोल ते डीजल दे भाएं च लोकसभा चुनाव थवां पैहले फीह लीटर स्हाबै 2 रपे दी कटौती कीती ऐ।
- 4 पी.ओ.जे.के, पच्छमी पाकिस्तानी रिफ्यूजिएं ते कश्मीर विस्थापित परौआरें दे 350 युवाएं गी अपना कम्म रोजगार शुरू करने लेई माली मदाद उपलब्ध करोआई।

<><><><><><>

EC Electoral Bonds

निर्वाचन आयोग नै चुनावी बांड कन्नै सरबंधत आंकड़े अपनी वेबसाइट पर अपलोड करी दित्ते न। भारती स्टेट बैंक नै सर्वोच्च अदालत दे निर्देशें दी पालमा करदे होई इस म्हीने दी 12 तरीक गी चुनावी बांड सरबंधी आंकड़ें आहला ब्यौरा चुनावs आयोग गी उपलब्ध करोआया हा। एह डेटा वेबसाइट www.eci.gov.in/candidate-politicalparty पर उपलब्ध ऐ। चुनावs आयोग नै आखेआ ऐ जे उन्नै म्हेशां स्पष्टिकरण ते पारदर्शिता गी खास महत्व दिता ऐ।



Election Commission

रिटयर्ड आइ.ए.एस. अधिकारी घनश्याम कुमार ते ते सुखवीर सिंह संधू होंरें गी चुनांस कमिशनर नियुक्त कीता गेआ ऐ। कन्न ते न्यास मंत्रालय नै इस सरबंधा च इक अधिसूचना जारी करी दिती ऐ। अनुप चंद्र पांडे हुंदे सेवानिवृत्त होने मगरा ते अरूण गोयल हुंदे इस्तीफा देने मगरा द'ऊं चुनां कमिशनरें दे ओहदे खाली पेदे हे।



Kovind Panel

इक्क राष्ट्र इक्क चुना पर उच्च स्तरीय समिति नै दिल्ली च राष्ट्रपति द्रौपदी मुर्मू होंरें गी रिपोर्ट सौंपी। उच्च स्तरीय पैनल नै लोकसभा ते राज्य विधानसभा चुना 100 दिन दे अंदर-अंदर कराई लैने बारै इक सुझा दिता ऐ। साबका राष्ट्रपति रामनाथ कोविंद होंरें आखेआ ऐ जे 18 ज्हार थवां मते सफे पन्ने आली रिपोर्ट च आखेआ गेआ ऐ जे कन्नो-कन्नी चुना करोआने कन्नै संसाधनें दी बचत होग। बेहतर ढंगगै सिर विकास होग। लोकतंत्र दी बुनियाद मजबूत होग ते मुख्य दी आसें-तांगें गी पूरा करने च मदद होग। दल नै 321 सफें गी सार्वजनिक कीता ऐ।



AC IMP Film Policy

उपराज्यपाल मनोज सिन्हा हुंदी अध्यक्षता च होई दी प्रशासनिक कौंसल दी बैठक च जम्मू ते कश्मीर फिल्म नीति 2024 गी मंजूरी दिती। आकाशवाणी संवाददाता दी रिपोर्ट मुजब इस

नीति दा मकसद जम्मू-कश्मीर गी फिल्म सरबन्धी निर्माण ते रचनात्मकता दे केंद्र तौर पर विकसित करना ऐ। एह नीति जम्मू-कश्मीर फिल्म नीति 2021 दी थाहर लैग। इस नीति तैहत प्रशासनिक मदद, फिल्में दी शूटिंग आस्तै इक्कै थाहर थवां सारियां मंजूरियां लैने लेई सरिस्ता, माली सहायता सरबन्धी पैकेज, सरकार ते गैर सरकारी संगठनें गी बढ़ावा दिता जाग। प्रशासनिक कौंसल नै घरेलु उपभोक्ताएं लेई बिजली सरबन्धी एमनेस्टी स्कीम 2022 गी 21-3-2025 तगर बढ़ाने गी मंजूरी दिती ऐ। कौंसल नै 22 कनाल 2 मरला जमीन गांदरबल च पशु पालन मैहकमे गी डेयरी प्लांट कायम करने लेई मुंतकिल करी दिती ऐ।

<><><><><><>

AC-Tourism

उपराज्यपाल मनोज सिन्हा हुंदी अध्यक्षता च होई प्रशासनिक कौंसल नै मुबारक मंडी हैरीटेज सोसायटी जम्मू दे प्रशासनिक मैहकमे गी सैलसफा मैहकमे दी थाहर सांस्कृतिक मैहकमे गी मुंतकिल करने दी मंजूरी दिती ऐ। मुबारक मंडी हैरीटेज सोसायटी गी सांस्कृतिक मैहकमे तैहत आनने कन्नै एहदी सब्बै परियोजनाएं सांस्कृतिक मैहकमे दे बजट दा हिस्सा बनी जाडन जेदे कन्नै विरसे दी सांभ-संभाल होर असरदार तरीके कन्नै होग ते फंडिंग सरबन्धी मसलें दा नबेड़ा बेहतरीन तरीके कन्नै कीता जाई सकोग। कौंसल नै जम्मू रोपवे परियोजना थमां मुबारकमंडी हैरीटेज कम्प्लेक्स तगर तकरीबन 25 करोड़ रपे थवां बद्द दी लागत कन्नै लिफ्ट लाने दी बी मंजूरी दिती ऐ।

<><><><><><>

DGRC

आयुष्मान भारत प्रधानमंत्री जन आरोग्य तैहत शकैतें सरबंधी जिला सतह दी कमेटी दी अध्यक्षता करदे होई जिला मजिस्ट्रेट सचिन कुमार वैश्या होरें आयुष्मान भारत परियोजना दे दिशा-निर्देशें दी खलाफवर्जी करने आले दऊं अस्पतालें पर जुर्माना लाने दी प्रदेश सेहत एजेंसी गी सफारश कीती ऐ। कमेटी आस्सेआ इनें दऊं अस्पतालें गी सरकार आस्सेआ चलाई जा रदी इस फ्लैगशिप स्कीम दे दिशा-निर्देशें दी खलाफवर्जी करदे होई कसूरवार पाया गेआ। बैठक दौरान इस सेहत बीमा परियोजना कन्नै सरबंधत होरनें मसलें दे नबेड़े बारै बी व्यापक विचार-विमर्श होआ। इस बैठक च चीफ मेडिकल अफसर सने कमेटी दे सदस्य, असिस्टेंट कमिशनर डिवेलपमेंट, शकैतें सरबंधी जिला नोडल अफसर ते होरनें मुतलका अधिकारी बी मौजूद हे।

<><><><><><>

DD-Application

दूरदर्शन केंद्र जम्मू दी इलाकाई समाचार यूनिट पास्सेआ जम्मू प्रांत दे सब्बनें जिलें आस्तै स्टिंगर्स ताई दरखास्तां मंगियां गेइयां न। जम्मू जिले आस्तै 5 ते बाकी जिलें आस्तै 2-2 स्टिंगर लैते जाडन। ताल्ले गेदे लोकें गी दूरदर्शन समाचार जम्मू आस्तै खबरें आलियं घटनाएं ते कार्यक्रमें गी कवर करना होग ते जरूरत मुजब रिपोर्टां बी देनियां होडन। दरखास्तां देने दी प्रक्रिया पूरी चाल्ती ऑफलाइनें ते एहदे ताई खीरी तरीक 6 अप्रैल 2024 रक्खी गई ऐ। दरखास्ती फार्म वेबसाइट www.ddindia.gov.in परा डाउनलोड कीते जाई सकदे न जां फीह एह समाचार प्रमुख दूरदर्शन जम्मू दे दफतरै थवां बी हासल कीते जाई सकदे न। एहदे अलावा एह फार्म डी.डी न्यूज जम्मू दे फेसबुक ते ट्वीटर हैंडलें पर बी उपलब्ध न।

<><><><><><>

Shah Petrol

केंद्री गृह मंत्री अमित शाह होरें देश च पेट्रोल ते डीजल दी कमीतें च कमी करने दे उंदी सरकार दे फैसले दी बड़ी मती सराहना कीती ऐ। इक सोशल मीडिया पोस्ट पर शाह होरें गलाया जे उंदी सरकार दे इस जत्नें कन्ने पिछले ढाई बरें च पेट्रोल दी कीमतें च 15 रपे फी लीटर ते डीजल दी कीमतें च 17 रपे फी लीटर दी कमी आई ऐ। उनें प्रधानमंत्री हुंदा एह फैसला लैने लेई आभार प्रगट कीता।

<><><><><><>

J&K POJK

जम्मू-कश्मीर च विस्थापित ते प्रवासी समुदायें दे आर्थिक सशक्तिकरण लेई इक बड्डी गैह पुट्टदे होई प्रशासन नै कल 350 युवाएं गी अपना कम्म-रोजगार शुरू करने लेई माली मदाद उपलब्ध करोआई। एह सब्बै नौजवान पाकिस्तान दे नजैज कब्जे आहले जम्मू-कश्मीर दे विस्थापित परोआरें, पच्छमी पाकिस्तान दे रिफ्यूजिएं ते कश्मीरी प्रवासी परोआरें कन्ने सरबंधत न। लेफ्टिनेंट गवर्नर मनोज सिन्हा होरें कल जम्मू दे कन्वेंशन सेंटर च इस बारे लोआए गेदे समारोह दी प्रधानता कीती। उनें आखेआ जे इनें युवाएं गी दिती जा रदी माली मदाद कन्ने उंदे सुखने पूरे होडन ते समाज च उद्यम कारानादारी गी बढ़ावा मिलोग।

<><><><><><>

DGP on Drug

पुलस महानिदेशक आर.आर.स्वैन होरें आखेआ ऐ जे पुलस जम्मू-कश्मीर च नशीले पदार्थें सरबंधी माड़ी कबैतू गी आतंकवाद आला लेखा लैग। छन्नी हिम्मत च नशा मुक्ति ते मानसिक पुनर्वास केंद्र दे उद्घाटन मौके डीजीपी होरें आतंकवाद रोधी जत्नें सरबंधी रणनीति

बारै बी गलाया। उनें गलाया जे जम्मू-कश्मीर च आतंकवाद गी काबू करने लेई आतंकवाद गी बढ़ावा देने आले उंदे हिमायती ते समर्थन देने आले दी पंछान कीती गई। उंदी ताल कीती गई जेड़े माली इमदाद दिंदे न। युवाएं गी सिखलाई दिंदे न, ऐसे लोकें दी संपत्तिएं गी जब्त कीता गेआ, नष्ट कीता गेआ ते गैर कनूनी गतिविधिएं दी रोकथाम सरबंधी कनून तैहत मामला दर्ज कीता गेआ। इस्सै चाल्ली दा तरीका नशीले पदार्थ दी तस्करी करने आले ते ओह लोक जेड़े इस गैर कनूनी कारोबार च शामिल न, उंदे खिलाफ बी अपनाय जाग।

<><><><><><>

Road

डोडा जिले दे कलोटा हम्बल ते बेरगना ग्राएं दे बसनीकें लेई केंद्र सरकार नै 13 करोड़ 74 लख रपे दी शिड़क परियोजनाएं गी मंजूरी दिती ऐ। एहदे अलावा भद्रवाह ते हिमाचल प्रदेश बश्कार 6 किलोमीटर लम्मी कलजुंगल सुरंग बनाने लेई व्यापक प्रोजैक्ट रिपोर्ट तैयार कीती गई ऐ। इस लेई टेंडर जारी करने आली प्रक्रिया आदर्श आचार संहिता दे खत्म होने दे मगरा जारी कीती जाग। केंद्री राज्यमंत्री डॉक्टर जितेंद्र सिंह होरें आखेआ ऐ जे इस सुरंग दे निर्माण कन्नै डोडा-भद्रवाह हिमाचल प्रदेश दे चम्बा कन्नै जुड़ी जाडन ते दौनें थाहरें बश्कार छिंडा बी घट्ट होग।

<><><><><><>

Samba

सैलसफा निदेशक विवेकानंद राय ते सांबा दे डिप्टी कमिशनर अभिषेक शर्मा सनें होरनें मुतलका अधिकारिं प्रसाद स्कीम तैहत पुरमंडल-उत्तरवैहनी सर्कट दा किट्ठै रलियै दौरा लाया। इस पैहलकदमी दा मकसद पुरमंडल उत्तरवैहनी गी इक धार्मिक थाहर बनाना ऐ तां जे

तीर्थ यात्रुएं दी यात्रा भद्रवाह कन्नै ते सुकून भरोची होए। इस दौरान ढांचागत विकास, सांस्कृतिक विरसे दी सांझ-संभाल ते यात्रुएं दे सफर गी होर बेहतर बनाने बारै व्यापक चर्चा कीती गई ते इलाके दी कुदरती ते धार्मिक मूल्य दे संरक्षण आस्तै जत्न कीते जाडन।

<><><><><><>

Highway

साफ मौसम ते शिड़कें दी बेहतर हालत दे मददेनजर हल्की गड्डिएं ते निजी कारें दी दौनें बक्खी दी आओजाई बहाल करी दिती गई ऐ। उआं शिड़क दी हालत दा मुआयना करने मगरा गै भारी गड्डियें दी आओजाई गी काजीगुंड आहली थाहर नवयुग टनल राएं जम्मू जाने दी इजाजत दिती जाग। भद्रवाह-चम्बा, किशतवाड़-सिंथ-अनन्तनाग शिड़कें पर गड्डियें दी आओजाई बर्फ कारण अजें बी बंद ऐ।

<><><><><><>